

Ka watea ake era ahuatanga ka huri ake ki etahi o nga take o taua hui. Te Tiriti o Waitangi, Te Whakatapu paanga whenua, Whakanohonoho, Te Whaka tikatika i nga Ture Whakawhiwhi Moni mo nga mahi whakanohonoho whenua, Te Ture Waipiro, Te Mate Kohi me Te Tari Ora, Te Pihopa o Aotearoa. I waho atu i nga Maori, ko nga tino tangata mo aua take e whakahuatia i runga ake nei, kotahi ano i ngaro ko Pihopa Aotearoa anake. Otira i reira hoki Te Pihopa o Waiapu, koiane te tumuaki o Aotearoa, kaati kapi tonu mai tera tuunga. Me whakararangi ake taua ropu e kiia ake nei Te Mangai o Te Pirimia, Forbes, Te Tumuaiki o nga Tiati Kooti Whenua Maori R. N. Jones (Koia ano hoki Te Under Secretary o Te Tominiana o Nui Tireni, Judge Rawson Te Kaitiaki Maori, King, Te Kaitiaki Tuarua, Shepard o Te Tari Ora me Takuta Ellison Tumuaiki o Te Tari Ora mo Te Taha Maori, K. S. Williams te mangai o Te Apitihana, nga Tiati Kooti Whenua Maori, nga Apihi o Te Whakatapu Take paa-nga, me nga Apihi Whakamaori o Te Tari Maori.

Katahi ano ka penei te huinga o tenei ropu o Te Tari Maori o Te Kawanatanga o Te Tominiana o Nui Tireni ki raro i Te Minita Maori arao Ta Apirana Ngata. He nui rawa tenei ahuatanga a e tika ana kia noho ngahuru i roto i nga korero whakapapa a Te Kawanatanga. Mehemea hoki ma Te Toa e whakatakoto—E! ka uru! Ko tenei me tumanako noatu.

Tenei mea a te puawai me te ngahuru he mea e tino ngakauaitia ana e te tangata whakaaro nui e te ngakau ahuhenua, mo nga mea i whakatoa atu i nga ra o te tiringa purapura, i whakaata ake ai i te koanga o te tau. ka whai atu te whakaaro i te mea ka whakawairakau te kawai te whanui, ki te tiketike, ki te hohonu, ki te taumaha ranei o nga hua o aua purapura, ahakoa he tinana, he whakaaro ranei.

No te ra i te hui i tu nei ki Waiomatatini, rite tonu taua wa ki te kaupeka o te tau e kiia ra ko Te Ngahuru-o-Poututerangi.

Nga maara, nga waerenga o tenei mea o te Whakaaro-nui, tiraha marakerake ana i te ra e whiti ana. ,

Ahakoa pehea te roa o nga ra e mihi ana tetahi ki tetahi, i papakirua ai nga tai e wha o te motu, i eke mai ai nga taniwha, nga taaura kai-kakariki, nga puhi-kaiariki. me nga puhi patu-moana, me nga kai-hautu o tena waka o tena waka, te moea te po, i te whakaaro nui kia kite a kanohi atu, kia kite mai, kia rongo atu, kia rongo mai, ara kia kori tahi i ta Turaukawa e mea "*Kotahi to te po! Moea mai o whatu!*"

Ahakoa i taha te kawau, i runga i tena toka, i tena tarere, i tena kopua, i nga wai-whakaripo o Rangi-nui me Papa-tuanuku, na Te Kai-hauka a te Wiwi a Te Wawa ko Tamahori ko Kohere, ko Moana "Ka whakairi ki runga o Hikurangi! Koia!"